

# «La tenda d'Abraham»

## Occurrenzas cuminaivlas da trais religiuns a Basilea

DA GUIU SOBIELA-CAANITZ

■ **«Ti, va davent da tes pajais, da tia schlatta, da tia chasa paterna, vers il pajais ch'jau ta mussa lura.» Uschia rapporta la Bibla (Genesis 12: 1) ils emprims pleds da Dieu ad Abram; quest survegn pli tard in num nov: Abraham («bab da blera glied»). L'emprim cumond ch'el ha survegnì è in dals vers ils pli famus ed ils pli commentads da la Bibla; cun el vegn Abram-Abraham l'emprim pelegrin perquai ch'el sa fida da Dieu. Ils gidieus devozius al numnan «Avraham avenu» («A. noss bab»). El vegn schizunt commemorà d'ina terza religiun: Il 19avel chapitel dal Coran, cudesch sontg da l'islam, rapporta ch'Ibrahim haja crititgà il pajanisssem da ses bab: «Pertge aduras quai che n'auda betg, na vesa betg e na ta nizzegia betg?» Il terz chapitel punctuescha: «Ibrahim n'era ni gidieu ni cristian, mabain in aderent da la cretta stgetta, in uman attaschà a Dieu.» Il Nov Testament di: «Abraham è vegnì numnà ami da Dieu» (Brev da Giachen 2: 23). Hebron, la citad d'Abraham en Palestina, ha num per arab «Al-Halil» («l'ami»). Il teolog catolic Karl-Josef Kuschel (Universitad da Tubinga) ha scrit in essai en spiert ecumenic davart il maletg d'Abraham en las trais religiuns; el concluda: «Il futur da l'Europa e dal Proxim Orient en il terz millenni pudess depen-**

der a moda decisiva da la dumonda: Chattan gidieus, cristians e muslims la via d'in'attaschadad en il senn d'Abraham?» (1).

### «Sperar è in'activad»

En lez senn è naschi 2009 a Basilea il project «Tenda d'Abraham: Cooperaziun publica, cun ils medems dretgs, da gidieus, cristians e muslims» ([www.zelt-abrahams.ch](http://www.zelt-abrahams.ch)) sut il motto: «Esser differents senza tema.» Las finamiras èn las suandantas:

1. Arranschar e manar raschienis davart la cretta tranter aderentas ed aderents da las trais cuminaanzas religiusas.

2. Porscher ad in vast public l'occaziun d'emprender d'enconuscher ductrinas, praticas ed intents da las trais religiuns en raschienis directs e projects cuminaivels.

3. Gidar a stgaffir e profundar ina fidanza vicendaivla tranter lezzas cuminaanzas.

4. Esser cartent en il context da la societad moderna, a moda raschunavla e chapibla.»

Tge munta quel project? «'Tenda d'Abraham' envida a visitar cults divins da las trais religiuns; ina na prevesa dentant nagin arranschament cultic cuminaivel. La collavuraziun da las trais cuminaanzas è lianta e vardavla; ella sa funda sin ils medems dretgs. Il project vegn rea-

lisà ad emprova per trais onns; en il terz onn decid'ins sch'el vegnia manà enavant e, sche quai è il cas, co ch'ins duaja al finanzia. Durant il temp d'emprova sutscrivan la Cumissiun islamica basilaesa e la Fundaziun cristiana e giudaica in contract (...) che regla las cundiziuns da basa. Padrinadis e daners da la lottaria BS e BL finanzieschan il temp da prova. Ins duai supplitgar fundaziuns da sustegnair il project.» El vegn manà da la muslima Kadriye Koca, da plevon Nico Rubeli e da la gidieua Anat Weil. Ils 13 da matg ha questa retschavi cristians e muslims religius en la sinagoga gronda da la citad. Ils 29 da matg ha Kadriye Koca retschavi cristians e gidieus religius tar l'Uniun islamica tirca da BS e BL. Marcurdi, ils 5 da zercladur a las 19.00 retschaivan ils plevons Benedict Schubert e Nico A. Rubeli en la «Peterskirche» reformada da la citad (2). Rubeli: «Gidieus han vardads, cristians han vardads, muslims han vardads, nagin n'astga sa metter sur tschels cun pretender da posseder la vardad per excellenza, era sche mintga vardad resta differenta (...). Sperar è in'activad che nus accumulim mintga di.»

**1. Karl-Josef Kuschel, Streit um Abraham. Was Juden, Christen und Muslime trennt – und was sie eint. Düsseldorf (Patmos, ISBN 3-491-69030-7) 2001, p. 306.**

**2. Peterskirchplatz 7. Tram nr. 3, bus 30/34 enfin a l'universitad.**